



Cum ante hoc quadriennium Borhekus Vir Clarissimus a me per litteras petiisset, ut, cum ipse Aeschyli tragoediarum nouam moliretur editionem, ego sibi lectionis varietatem e codice Academicæ bibliothecæ Vitebergensis suppeditarem: equidem, cum ut recens aduentum plane ignorarem, quales libri in bibliotheca exstarent, ut honestissimis et æquissimis Viri de Graecis litteris optime merentis precibus satisfacerem, extemplo consului de hac re eum, qui illo ipso tempore munus custodis bibliothecæ gerebat. Hic vero, quibus causis adductus nescio, negauit, eiusmodi codicem Vitebergæ exstare. Igitur cum de hominis fide non dubitarem, et in hanc opinionem facile inductus essem, ut crederem, codicem illum, si olim hic fuisset, aut casu quodam periisse, aut hominum siue incuria siue iniuria sublatum euanuisse; respondi ut rem putabam, et ita, quamquam sine culpa mea, vanus mendaxque exstiti. Nam cum ante hos paucos dies casu quodam in Sennerti Athenas incidissem, ibique in catalogo librorum philosophicorum codicem Lycophronis, Hesiodi, Aeschyli et Cleomedis notatum reperissem: statim rei nouitate commotus ipsam adii bibliothecam, et facile quem quaerebam reperi. Est vero codex chartaceus, seculo circiter tertio et decimo scriptus, qui, praeter Lycophronem cum Tzetis commentario, Hesiodum cum commentario, Cleomedem de Circulis, priorem partem Euripidis Hecubæ, (de quorum librorum lectionis varietate alio tempore videbimus.) continet tres Aeschyli tragoedias priores, sed foliis aliquot mutilatas, Prometheus vincitum, Septem contra Thebas et Persas, cum scholiis et breuioribus inter versus et longioribus pensis cuique adiectis. Haec scholia quidem fere cum vulgatis conueniunt, sed interdum discrepant exhibentque luculentiorum verborum rerumque explicationem. Etsi autem textus ipse haud raro, fateor, vitis librarii crassioribus laborat: continet tamen interdum lectiones bonas et vulgatis haud dubie praeferendas. Contuli igitur illas tragoedias cum editione Aeschyli Stanleiana, quae anno proximi seculi sexagesimo tertio Londini prodiit, et discrepantiam lectionis bonam malamue in hac prolusione lectoribus seu potius editoribus Aeschyli exhibui.